

Judith Werleman:

“Mi kier haci e tema di anochi amor”

ORANJESTAD – Judith Werleman ta un persona cu actualmente ta poniendo hunto un anochi artistico pa lanta fondonan pa cumpra su bukinan di scol. Riba dia 14 di februari na Don Pincho's di 8or pa 10or di anochi e lo tin un actividad pa asina yega na su meta. E ta conta cu e kier haci e tema di anochi amor ya cu hopi hende ta yena cu odio y gusta husga.

Artistanan cu lo presenta e anochi ey, lo ta entre otro duo di rap Central Pieces y poeta local Yakari Gabriel. “Hopi hende ta pensa cu nan ta stima un hende pero no ta respeta e, Pues e anochi ey ta un momento cu e artistanan lo expresa liber y despues hunto cu e publico lo bay sinta na mesa y por haci pregunta of duna comentario” Sra. Werleman ta bisa. E ta conta cu e ta naci na Aruba y su mayornan tambe ta di Aruba. E tin un



yiù homber di 9 aña y un yiu muhe di 5 aña. Aworaki e tin 34 aña y dia cu el a haya sa cu na EPI nan ta tuma adulto, na careda el a bay. E motibo cu e la scoge pa Horeca ta pa e simpel motibo cu e ta desea di practica hospitalidad. E ta den su di dos aña y falta 1 aña mas pa caba. Ora e caba EPI e ta conta Bon Dia Aruba cu e ta desea di sigui studia.

Idea artistico

Segun sra. Werleman desde december caba e tabata busca un fecha pa wak kico e por

haci.

El a cuminsa busca luga y e unico luga cu e por a haya tabata Tearto Ser'i Noka.

El a te hasta bay wak e luga pero e mester a bay cerca un pastoor pa mas informacion cual e no a logra haci.

Traha y bay scol

Sr. Werleman ta conta: “Na comienso mi tabata traha y bay scol pero e tabata hopi duro, vooral pa mi yiu nan cu casi no tabata wak mi, pa e motibo ey mi a stop di traha. Despues mi a keda un tempo

chikito sin bay scol pa motibo cu mi tata a fayece. Awo mi a cuminsa poco poco cu part-time, manera mi caba mi tin planea bay full time bek.”

Segun sra. Werleman desde aña pasa caba e kier a planea un anochi di declamacion pero e tabata keda hala esaki. Cada bes e tabata pone un fecha pero keda cambia esaki. Segun e, Sheila Werleman tabata un persona cu tabata keda encurasha su persona pa tene pasenshi. “Despues e artistanan di Rosea Cultural cu mi tabata baila un tempo den e grupo aki caba, tambe tabata motivami.

Ora mi a caba cu e curso di actuacion, mi a puntra mi amiga di tempo di nos hubentud esta Marylou Maduro y di biaha el a duna okay. Mi gran deseo pa e anochi ey ta pa scucha Lia Tromp y Quincy Hasham canta duo, pasobra mi gusta tur dos nan stem y mi tin sigur cu nan lo canta maraviyoso e anochi ey. E



unico cos falta ta e propaganda y mi deseo ta pa e cuminsa sali pa diabierna awor of si por prome ta miho “ Sra. Werleman ta comenta.

Cansa

“Ora mi haya stress of ta hopi cansa mi no ta forsa, mi ta relax, tuma sosiego y ora mi ta full descans mi ta bolbe sigui dilanti cu stapnan positivo. “ Sra. Werleman a subraya. □